

WABAK BERITA PALSU SANGAT BERBAHAYA

Oleh: Nur Adilah binti Ab Aziz, 1171757,

Fakulti Kepimpinan dan Pengurusan (FKP), Universiti Sains Islam Malaysia (USIM)

Disiarkan pada 1 Ogos 2020



Tatkala dunia sedang berperang melawan virus COVID-19 dan ribuan nyawa telah terkorban. wujud pula ‘wabak berita palsu’ yang tidak boleh dipandang ringan.

Tanpa kita sedari, wabak ini sudah lama wujud dan membelenggu hidup sekalian manusia. Ia semakin menjadi-jadi ekoran kewujudan telefon pintar yang membolehkan internet dicapai dari mana-mana sahaja.

Terlalu banyak maklumat yang diterima melalui aplikasi media sosial seperti WhatsApp dan Facebook dan dikongsi oleh masyarakat tanpa disemak kesahihannya terlebih dahulu.

Pada peringkat awal penularan COVID-19 di negara ini, tersebar berita palsu kononnya seorang warga emas dari China meninggal dunia akibat jangkitan virus tersebut di Kompleks Sultan Abu Bakar, Johor.

Sebenarnya, seperti yang disahkan oleh pihak polis, insiden itu melibatkan seorang warga emas berumur 78 tahun dari Singapura yang meninggal dunia akibat serangan jantung.

Penularan berita palsu tidak sekadar terhad pada isu pandemik COVID-19 sahaja. Pernah juga disebarkan maklumat palsu kononnya Johor akan dilanda tsunami.

Malangnya, ramai yang mempercayai berita palsu itu bulat-bulat dan tanpa berfikir panjang, mengirimbkannya pula kepada orang lain. Situasi ini memang amat membimbangkan.



Boleh dikatakan ramai yang bergelar ‘wartawan tak rasmi’ memainkan peranan menyebarkan maklumat yang tidak sahih sehingga menimbulkan kekeliruan dalam kalangan masyarakat.

Realitinya, kesan penyebaran berita palsu sangat besar bukan sahaja dari segi sosial, ekonomi, politik malah kepada negara.

Wabak berita palsu boleh menimbulkan keresahan dalam kalangan masyarakat, menjejaskan perniagaan dan menimbulkan suasana tidak stabil di negara ini.

Kita pula janganlah menyebarkan maklumat dengan pantas dan membuta tuli tanpa memikirkan kesannya kepada yang lain. Bak peribahasa Melayu, ‘kelam disigi, lekung ditinjau’.

Sememangnya akhir zaman ini penuh dengan fitnah dan penipuan yang berleluasa. Fitnah dalam media sosial ketika ini amat dahsyat dan penuh dengan perkara-perkara yang tidak masuk akal.

Sebagaimana firman Allah SWT dalam surah al-Baqarah, ayat 191:

وَالْفِتْنَةُ أَشَدُّ مِنَ الْقَتْلِ

Maksudnya: ... dan (ingatlah bahawa angkara) fitnah itu lebih besar bahayanya daripada pembunuhan.

Marilah kita sama-sama mengekang wabak berita palsu daripada melarat dan menimbulkan kemudaratn terhadap masyarakat.

Seperti yang dinasihatkan oleh kerajaan berulang kali, jangan kongsi maklumat yang tidak dipastikan kesahihannya dengan orang lain.

SEBENARNYA.MY
Tidak Pasti Jangan Kongsi

